

## **A Pas ane Pol tetek E Pilimon**

*A warwara talapor nigo*

E Pol i kes ting na karabus tumo e Rom anasa i warawai ana Wakak a Warwara. Ning i kes tingia, i tumus diat a pas. Takai tetek a tarai Epeses, takai tetek a tarai Pilipai, takai tetek a tarai Kolosi pa takai otleng tetek e Pilimon.

E Pol i tumus a pas ne tetek e Pilimon. E Pilimon a leklek a barsan miting na hanua Kolosi, pa tena tortorot otleng. Anuna ning a tena titol oros, a risana e Onesimus, i liu pas kusuni. Lamur di doti pa dia arpastek ma e Pol ting na karabus. E Pol i warawai teteki pa i lingir a nuknukna. Ning di pak sen e Onesimus, e Pol i mang sur ir ulak tetek anuna ningnigo e Pilimon, pa i tumus a pas ne tetek e Pilimon sur e Onesimus ir losi teteki. I atai i mang gong i balakut tetek e Onesimus, ir gas pasi, anasa ka lingir tar a nuknukna pa i tortorot oe Iesu arlar oe Pilimon.

### **A tinan ana buk Pilimon:**

A kamkama buk ne (1-3)

A wakak a toltol ane Pilimon (4-7)

E Pol i mang sur e Pilimon ir gas pas e

Onesimus (8-22)

A ararop a warwara ane Pol tetek e Pilimon  
(23-25)

<sup>1</sup> Iau, e Pol, a kes ting na karabus anasa a tortorot oe Karisito Iesu. Miau ma e Timoti a

tasindala, mia tumus a pas ne tetek u Pilimon, a wakak a halimila ana titol,

<sup>2</sup> pa tetek e Apia a tasindala hane, pa tetek e Arkipus a halindala na harum ana Wakak a Warwara, pa tetek a tarai a lotu ning mulo sira han taum ting na num a rumai.

<sup>3</sup> A marmaris pa balmolmol ta e God a Tamandala, pa Leklek e Iesu Karisito ir kes taum omulo.

### *A marmaris pa tortorot ane Pilimon*

<sup>4</sup> Ning a araring, a sira nuk pas u, pa atong wakak tetek e God hom,

<sup>5</sup> anasa a longori mang u mang sur a tarai rop ane God, pa u tortorot ana Leklek e Iesu.

<sup>6</sup> A araring mang ur apuasa anum a tortorot oe Karisito tetek a tarai, sur ur mananos kol ana wakak a ututnala rop anundala ning kaning oe Karisito.

<sup>7</sup> Tasiklik, ning a longori mang u mang sur a tarai ane God pa u agasgas anunla a lalaun, a gas kol, pa i wunan iau otleng.

### *A nunung ane Pol sur e Pilimon ir malmaling pas e Onesimus*

<sup>8</sup> Ning a utna a mang kol sur ur toli. Bel a matmataut sur ar warwara rakrakai tetek u onoi, anasa oe Karisito.

<sup>9</sup> Ika a nunung wowon u, anasa a mang sur u. Onone ia ka bun, pa kes te na karabus anasa a tortorot oe Karisito Iesu.

<sup>10</sup> A nunung u sur ur malmaling pas e Onesimus, a natuklik ana tortorot. Iau e tamana,

anasa a warwara talapor oe Karisito teteki ning i kes te na karabus, pa i tortorot.

<sup>11</sup> Lanigo bel i tolsot pas ta titol, ika onone, i a wakak a tena titol, tetek u pa tetek iau.\*

<sup>12</sup> Onone a sune ulak seni tetek u. Ning i han kusun iau i arlar larning i kibas a balak pa i han taum onoi, anasa a mang kol suri.

<sup>13</sup> A mang sur ir kes kama napirik, sur ir keles u Pilimon, sur ir tai alar iau, ning a kes te na karabus anasa ana Wakak a Warwara.

<sup>14</sup> Ika bel a mang sur ar angongos u sur nangan iau, a mang sur u ot ur toli ona num a gasgas. Bel ar tol ta utna tuk ning u ot ur malmaling.

<sup>15</sup> Ngandek e Onesimus i kes siklik pas masik kusun u, sur onone ir kes tikin ulak taum hom.

<sup>16</sup> Bel ma ir arlar ulak ana tena titol oros, ir arlar oe tasimlik momol ana tortorot. A mang suri, ika anum a marmaris teteki i itna kol, anasa i anum a tena titol pa tasimlik otleng ana Leklek.

<sup>17</sup> Ning u nuki mang da halna, ur gas ulak pas e Onesimus, arlar larning ur gas pas iau ot.

<sup>18</sup> Ning ka tol tar ta toltol laulau tetek u o i kibas pas anum ta utna, iau ar kelesi tetek u.

<sup>19</sup> Iau e Pol a tumus a warwara ne ana kuk ot: ar keles tar a dinau ning tetek u. Bel ar atong ta utna tam, u ot u ka tasmani mang a tona lalaun ning u kibasi, i kamkamna ot hok, pa i arlar ana dinau tetek u.

---

\* **1:11: 1:11** A rising Onesimus a kamkamna mang “i tolsot pas ot a titol.” **1:16: 1:16** 1 Timoti 6:2

<sup>20</sup> Momol, tasiklik, ana risana Leklek, a mang sur ur tol asaning ia ka atong tari tam. U a tasiklik oe Karisito, ur agasgas anuk a lalaun.

<sup>21</sup> Ning a tumus a pas ne, a tasman momoli mang ur longor ot ana nuk a nunung tetek u, pa tasmani otleng mang ur tol a utna ning i itna kol tana utna ning a nunung u suri.

<sup>22</sup> Ning a utna otleng, a nunung u sur sang ta tuka rumai sur iau. A tortorot mang e God ir alangolango sen iau kusun a karabus sur ar han ulak tetek mulo. Ine a wana numulo na niaring.

### *A ararop a warwara na marmaris*

<sup>23</sup> E Epapras, esaning i karabus taum hok anasa ana tortorot oe Karisito Iesu, i saran anuna marmaris tetek u.

<sup>24</sup> Pa la otleng ne, e Mak, e Aristarkus, e Demas pa e Luk. Mila halalna taum ana titol.

<sup>25</sup> A marmaris ana Leklek e Iesu Karisito ir kes ting na ingumulo.

**A Wakak a Warwara ane God**  
**The New Testament in the Label language of Papua**  
**New Guinea**  
**Nupela Testamen long tokples Label long Niugini**

copyright © 2023 Wycliffe Bible Translators Australia

Language: Label

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-02-02

---

PDF generated using Haiola and XeLaTeX on 11 Mar 2026 from source files dated 2 Feb 2026

13fa0832-6e31-5347-b6eb-57b79224ca94